



KOMUNIKADO PA PRENSA

Fecha
06/09/2016

Accountmanager di Komunikashon
Jhanirha Da Costa Gomez

Email
jhanirha.anita@gobiernu.cw

Inisio Oficial di proyekto ‘Bo kas na bo midí!’

Willemstad –. Den kuadro di su maneho pa hasi Kòrsou un dushi lugá pa biba i bishitá, Minister Suzy Camelia-Römer huntu ku Domeinbeheer ta duna inisio oficial na e proyekto ‘Bo kas na bo midí!’. Ta trata aki di kasnan pagabel ku originalmente ta ser otorgá na e kumpradó den forma di un kamber, un baño, sala i kushina. E kasnan aki ta brinda e posibilidat pa ekspandé te na tres kamber i dos baño. Ora e kumpradó kumpra e kas e ta risibí ku e fundeshi di e kas kompletu, pues ku e fundeshi kla pa ekspanshon, i ku pèrmit nesario (bouwvergunning) pa sigui ku konstrukshon di e kas segun forsa.

E seremonia i selebrashon di e inisio oficial ta tuma lugá djaweps 8 di sèptèmber, di mitar di 5 pa mitar di 7, aya na Sapaté, na e di dos kaya na man rèks di Kaya Mikeas, kaminda ta trahando kasnan nobo aktualmente.

E proyekto aki ta un proyekto PPP, esta Public Private Partnership, kual ta nifiká ku gobièrnu ta traha huntu ku partnènan privá pa traha bibienda pa nos suidadanonan. Den kaso di e proyekto ‘Bo kas na bo midí!’, ta enfoká riba e tradishon kurasoleño di hopi tempu unda hendenan lokal ta traha riba nan kas ku yudansa di famia, amigu i konosínan. E proyekto ta rekonosé e nesidat ku tin bou di un klase spesífiko di suidadanonan ku ke i por paga pa un kas propio di mas o ménos Fl. 95.000,-. Pa fasilidat e kumpradó riba tèrmino largu e proyekto ta ofresé e oportunidat pa rèk e kas segun deseo, nesidat i forsa.

Dusron Development & Construction B.V. ta e kompania enkargá ku konstrukshon di e kasnan i Sr. Lyongo Juliana ta e arkitekto. E proyekto lo tin un durashon di total di 18 luna. Tur ku ta interesá pa biba na Sapaté por tuma kontakto ku Dusron Development pa mas informashon. Tene na kuenta ku tin un lista di kriterio pa por bin na remarke di un di e kasnan aki.